

Emansipashon di Hende Hòmber

“Aki dies aña mester tin emansipashon di hende hòmber!” e kabayero a deklará. El a splika pa mi komprendé. “Mayoria alumno ku ta sigui un estudio eskolar atvansá ta mucha muhé. Komo resultado, pronto e hende muhé lo tin e puestonan klave den nos komunitat...mandatarionan, komersiantenan, lídernan.”

Maske e kabayero su deklarashon ta eksagerá, sin duda e ta mustra riba un realidat tristu pa kua nos no mester tapa kara.

Tin deskrepansia grandi segun sekso kon mayornan ta eduká nan yunan. Fo’i chikitu, e yu muhé ta siñá desaroyá abilidadnan, kuida su kurpa, ser responsabel. En kontraste, poko yu hòmber ta siñá responsabilidat. Hopi mayor asta ta kere ku e yu hòmber **mester** kore kaya. Si e ta na kas, nan ta haña tin algu seriamente robes kun’è...e ta “muhé!” Komo resultado e yu hòmber ta mira kas komo un lugá pa “tènk”: kome, baña, bisti, pa bolbe sali. Hasi kiko? Pa nan, hombresa ta demonstrá dor e kantidat di muhé nan por “konkistá” i nan abilidad pa pone yu riba mundu.

Ademas, na nos isla e yu muhé fásilmente por komprendé responsabilidat di dama. Su mama ta traha duru na kas (kisas afó tambe) pa kria e yunan. Ma ehèmpel di ken e yu maskulino por sigui pa bira un hòmber responsabel? Hopi tata ni t’ei—kisas e ta ku amigunan na snèk òf na fiesta ku un amante. Nos yunan hòmber ta irresponsabel pasobra blachi no ta kai leu di palu.

Un motibu nos ta produsí mas yònkuman irresponsabel ta pasobra tin tantu konfushon pa ku e ròl maskulino. Básikamente e tata tin tres responsabilidat...ku tin hopi implikashon.

1) E hòmber ta responsabel pa guia. Beibel ta bisa ku e hòmber mester “*manehá su mes kas bon*” (1 Timoteo 3:4).

Hopi hòmber tin impreshon ku yunan ta responsabilidad di mama so! Esei ta puru mentira! E idea aki ta laga nos yunan hòmber sin ehèmpel maskulino positivo den kas. Awor mas ku nunca, tatanan mester DEDIKA TEMPU pa duna guia na nan famia. Siña e yu hòmber pa ser un hòmber responsabel.

Bo’n por guia bo yunan den un bon kamina si bo mes no ta kana e kamina ei. E yònkuman ta kometé aktonan irresponsabel, immoral, i kriminal siguiendo ehèmpel di nan tata. “No ta bèrdat!” bo ta protestá. “Nunca mi a kometé un akto kriminal!” Talbes bo tin rason. Ma kòrdando ku yunan tin tendensia di hasi na un forma EKSAGERA loke mayornan ta hasi na un forma MODERA, ta opvio ku tòg nan ta sigui bo ehèmpel. Kisas bo nunca a usa droga; ma bo ta stima bo alkohòl. Bo ta taha bo yu di usa droga, ma bo aktitut pa ku bo droga legal ta kontradisí bo mes palabranan. Ora e ta usa droga, e ta sigui bo ehèmpel!

2) E hòmber ta responsabel pa proveé. Hopi tata ta kere ku nan a hasi masha kos ora nan ta duna sèn na kas anto ta usa sobrá pa nan propio interes. Ma dunando mama di bo yu sèn no ta kumpli ku bo responsabilidad. Plaka no por remplasá TEMPU ku bo famia. Bo famia tin nesidadnan fuera di esnan material. Sèn no por yena e nesidad emoshonal, sosial, spiritual, mental.

3) E hòmber ta responsabel pa protehá. Dios ta instruí e esposo pa trata su esposa “*ku komprehon, manera ku un vaso mas delikado...*” (1 Pedro 3:7). Un hòmber ku ta muchu kobarde pa kasa ku mama di su yunan por ser konfiá pa protehá nan?

Debí ku algun hòmber no tin tempu pa nan famia, nan no sa ki peliger nan ta enfrentá: mal amigu, desishonnan imprudente, falta di disiplina finansiero, sektanan, èts.

Tata, bo ta formando e siguiente generashon! Bo yu ta sigui bo ehèmpel. Lo su lógro mayó ta un lista di muhé konkistá ku yu den kada bario? Of lo bo siñ’è ta un **hòmber bèrdadero**: pa guia, proveé, i protehá su famia? Si bo no siñ’è ta responsabel awe, talbes lo e mester pidi pa emansipashon mañan!